

## PETERO ĜENA TORETORE GINIGUINENA

1 Petero vaĝa-foforina guruĝari

Petero tu kone ai maina tarimana, ma ĝia tu Iesu ĝena mo mero gabanana ruarua (12) nuĝanai maki. Mai fefa Petero na tu betaĝu Romai etoreato laĝani 62 ma 64 fakari nuĝanai ta. Mo tu Iesu maki emaseto murinai vau.

Siri baregori mai fefai tu karao 1:7; 4:12-13.

Mai fefa etoreato nuĝanai ĝia ĝena ura tu Iuda ekalesiari ema irau bese ekalesiari 1) bene vaĝa-kokoreri, be tarimarima na ĝevaĝa-midigu midigurito-ĝoi nuĝanai beĝene ruĝa-gwaĝiĝi; 2) ĝoirai veribaĝani baregori beĝe raga-ĝoitaĝorini moĝeri ĝana erovina-torerito; 3) ĝoirai Barau ĝena mareva baregona ĝeĝoira-taĝoani moĝa ĝeri evaĝa-foforiato; 4) bene launaĝiri, be ekalesia ĝauveiri korikori beĝene veiri.

Petero na ĝena fefa tu maĝesina eboioĝaiato:

1. Barau ĝena vevaĝa-maĝuri ma ekiraĝi-variĝu-ĝoiato - karao 1:1-2:10
2. Midigumidigu nuĝanai aiĝesina beĝene tanu - karao 2:11-4:11
3. Midigumidigu nuĝanai ĝeri veiĝa ĝobiri beĝene toreri - karao 4:12-5:11

<sup>1</sup> Au Petero, Iesu Keriso ĝena apostolo taugu, na mai fefa atore-iaĝosiani. Gomi, Barau ĝena ĝabi-viriĝi tarimami, ĝemi gabu korikori ĝoraĝa-kwanerito, toma tu Ponto ai, Galatia ai, Kapadokia

ai, Asia ai, ema Bitinia tano boruri ai ġotanulausilausini tarimami ġemi ai.

<sup>2</sup> Ġomi tu Barau, ġita Tamara, na eriba-guinemito ema eġabi-hidimito, ġena tarimarimai boġo iaġoni. E ġia Iaukana na evaġa-veaġamito korana tu, Iesu Keriso boġono seġaġi-vinia ema ġia rarana na bene ġuriġimi ġana, be veiareva boġono tanu Barau ġoiranai.

Barau ġena varevare-bara ema maino na bene vaġa-vonuvonu-raġemi.

### *Maġuri vanaġivanaġi*

<sup>3</sup> Barau, ġita ġera Vereġauka Iesu Keriso Tamana, sivaġa-namoa! Korana ġena vevetuġaġwa barego vedaureana lorinai, maġuri variġuna ġita evinirato, Iesu Keriso mase na evaġa-variġisi ġenoġoiato ġenana. Mai veiġa ġenana ġita nuġara tu maġuri vanaġivanaġi tatuġamaġi-kauani dagarana na evaġa-vonurini.

<sup>4</sup> E Barau na ġena tarimarima ġeri etore-rogoani vevaġa-namo baregona, bitana ġabia dagarana, tu ġoirai taġita-iaġoani. Barau na gubai etore-rogorini ġomi ġemi, korana monai tu asi beġe boraġani, asi beġe rakavani, e asi beġe verumuni.

<sup>5</sup> Ġomi tu ġemi veġabidadama dainai Barau seġukana na eġita-ġaumini, beiaġoni mo, ġia na varau erovina-toreato vevaġa-maġurina nega magonai bevaġa-foforiani, matami na boġo ġitaiani e boġo ġabiani.

<sup>6</sup> Ġomi toma kotunai tu midigumidigu barego ġoġanini, korana veribaġani irauirauri ġoġoitaġoni bene. Senaġi ġemi iaku tu bene

barego-lelevaġi, korana Barau ġena vevaġa-maġuri boġo ġabiani bene.

<sup>7</sup> Maġeri veribaġani irauirauri ġeiaġomani tu, Barau na ġomi ġemi veġabidadama etoto-iobuka iobukarini, korana Iesu Keriso befoforini ġaronai tu, Barau ġenana vevaġa-raġe e mareva namona ema vegubakau boġo doġariani. Golo karava na evaġa-namo vedaureaiani ma voina evaraġe-lelevaġini, senaġi ġomi ġemi veġabidadama voina tu ma varaġe lelevaġi.

<sup>8</sup> Ġomi na roġosi roġo maki ġoro ġitaia, senaġi ġoura-viniani. Initoma maki asi ġoġitaiani, senaġi ġoġabidadama-viniani ema iaku na ġovonu-vonu-raġeni. Ġemi iaku maki asi tau kirari vaġa-namona ta.

<sup>9</sup> Korana Keriso ġenai ġoveġabidadamani voina tu, ġomi vevaġa-maġuri ġoġoitaġoni.

<sup>10</sup> Mai vevaġa-maġuri maiġa tu peroveta tari-mari na ġevetau-ginikau ginikauato, ema ġia na ġekiraġi-tore guineato, mai varevare dagarana tu Barau na ġomi bevinimini, (Keriso beiaġomani ġaronai).

<sup>11</sup> Beiaġomani ġarona e kamasi beiaġomani beġene ribaia ġana ġetuġamaġi-vekwaraġito-ġoi. Mo negai Keriso Iaukana tu ġia nuġari ai eġauveito-ġoi ema ekira-vararito-ġoi, Keriso tu ġena midigumidigu bevevaġa-gwaġiġi-iaġiani, ma moġa murinaġi vau ġia marevana baregona beġabiani.

<sup>12</sup> Barau na peroveta tarimari evaġa-ribarito, ġia na mo vari ġeġobata-iaġiato-ġoi tu dia ġia tauġeri ġeri namo ġana, senaġi ġomi ġemi. Korana ġia na mo dagara, ġekiraġirito dagarari, tu toma

ġena vetuġunaġi tarimari na Vari Namona ġevari-fiuani guba na etuġu-mariġoato Iauka Veaġana seġukanai, be ġoseġaġini. Maiġeri dagara tu aneru maki ġeri ura baregona beġene ribaia.

### *Boġono veaġa*

<sup>13</sup> Moġa lorinai, nuġami beġene veiareva, boġono vevaġa-gwaġiġi. Iesu Keriso beforini ġaronai Barau na bevinimini varevarena ġenai, nuġami mabarana ġesi boġono torea.

<sup>14</sup> Barau natunai ġoiġoto nai, ġia boġono seġaġi-vinia. Barau asi ribami negari ai tauġani ġena ura rakavari na ġeġori-ġeġevamito-ġoi veiġari asi ma boġono vei-ġenoġoiri.

<sup>15</sup> Senaġi ekeamito Barauna tu veaġa, ilailanai ġomi maki boġono veaġa ġemi veiġa mabarari nuġari ai.

<sup>16</sup> Korana Buka Veaġa nuġanai etoreato, Barau ekirato, “Boġono veaġa, korana au tu veaġa.”

<sup>17</sup> Ġoġauġauni negari ai, Barau tu Tamami ai ġokiraġiani, ma ġia na tarimarima mabarari tu dabara sebonai moġo evaġa-maoro vinirini, tata ġeri veiġa ilailari ai; moġa lorinai mai tano-barai roġo ġotanukauni nuġanai tu, Barau boġono gubakaua e boġono seġaġi-vinia.

<sup>18</sup> Korana ma ribami, senemi ġeri maġuri rakavari ġomaġuri-iaġirito-ġoi ġerina Barau na evaġa-maġurimito ginitaġo dagarana tu asi be-rakavani dagarana. Dia silva o golo kavari.

<sup>19</sup> Senaġi evaġa-maġurimito ginitaġo dagarana tu Keriso rarana, rara namo vedaureana, Barau ġena mamoe natuna rarana asi mirona e kererena.

20 Ĝia tu Barau na tanobara roĝosi bere veia neganai veĝata, eĝabi-viriĝiato. Senaĝi ĝita vaĝa-maĝurira ĝana mai nega gabiri ai ema vaĝa-foforiato.

21 Ĝia bakunai Barau ĝoĝabidadama-viniani. Barau na mase ĝenana evaĝa-variĝisi-ĝenoĝoiato, e marevana baregona eviniato. Moĝa lorinai ĝomi na Barau ĝoĝabidadama-viniani, ema ĝemi tuĝamaĝikau ĝia ĝenai ĝotoreani.

22 Toma, ĝomi na guruĝa moĝonina ĝoseĝaĝi-viniato lorinai, tauĝemi ĝoveiarevato, ema karomi veĝabidadama tauri ĝesi moĝoni ai ĝoveura-vevinini. Moĝa lorinai boĝono veura-vevini ma nuĝami mabarari ĝesi.

23 Korana ĝomi tu ĝomaĝuri-ĝenoĝoito, tarima variĝu geragerami ai ĝoiagoto, dia tama sina ĝerina, ĝia tu ĝemaseni, senaĝi Barau ĝena maĝuri guruĝana, etanu-vanaĝi vanaĝini guruĝana, ĝenana evaĝa-maĝuri ĝenoĝoimito.

24 Buka Veaĝa ekirani kavana,  
 “Tarimarima mabarari tu reĝi kavana,  
 ĝia marevari tu reĝi ĝwaĝwana kavana.  
 Reĝi tu ĝemaraini,

ema veravera maki ĝeketoni,

25 senaĝi Vereĝauka ĝena guruĝa tu  
 betanu-vanaĝi vanaĝini.”

Mai guruĝa tu Vari Namona ĝomi ĝemi ai ĝevari-fiutato.

## 2

*Vereĝauka tu maĝuri forena, fore namo vedau-reana*

<sup>1</sup> Moġa lorinai, tuġamaġi rakavari mabarari, e ġofaġofa mabarari, e vemuriġoi mabarari, e mama, ema guruġa rakavari mabarari boġono fitoġa-kwareġari.

<sup>2</sup> Vau ġemaġurini mero keiri kavari boġono vei, vanaġivanāġi iauka ratana boka-kokena boġono boka-koke, be moġa niuniunai boġono barego e vevaġa-maġuri boġono ġabia.

<sup>3</sup> Korana ġomi tauġemi na ġodoġariato, Vereġauka ġena namo tu aiġesina.

<sup>4</sup> Vereġauka ġenai ġoiāġoma, ġia tu maġuri forena, tarimarima na ġefitoġaiato, korana asi ġena namo ta ġetato. Senaġi Barau na eġabi-viriġiato, korana fore namo vedaureana ġia ġoiranai.

<sup>5</sup> Maġuri foreri kavana ġoiāġoma, be ġomi maki Barau Iaukana na Rubu Veāġi bene raga-iaġimi. Monai Rubu Veāġa vereri veāġami ai boġono iaġo, ma Barau na Iesu Keriso bakunai eġabi-raġerini iauka varevareri, ġemi maġuri, boġono vinya.

<sup>6</sup> Korana Buka Veāġa ekirani,  
 “Au na fore namo vedaureana ta aviriġiato,  
 ġia tu Sionai (o Ierusalemaj)  
 duġu forenai avaġa-iaġoato.  
 Dei na ġia bevaġa-moġoniani  
 tarimana tu asi bemaikaiani.”

<sup>7</sup> Govaġa-moġoniani tarimami ġemi ai mai fore tu namo vedaurea, senaġi asi ġevaġa-moġoniani tarimari ġeri ai tu,

“Numa ragaragana tarimari na  
 asi ġeura-viniato nai ġefitoġaiato,  
 ġekirato fore rakavana,

dagarana tu fore mabarari fakari ai fore namo vedaureana, duġu forenai eiaġoto.”

<sup>8</sup> Ma toretore tai ekirani,

“Mai fore na tarimarima bevaġa-kake-naġirini, e bevaġa-ketorini forena.”

Barau ġena guruġa asi ġeseġaġiato dainai, ġevекake-naġito, mo tu Barau na ekiraġi-guineato, moġesi beġe veiani.

<sup>9</sup> Senaġi ġomi tu ġabi-viriġi besena, Kini ġena Rubu Veaġa veremi, bese veaġana, Barau ġena tarimarima. Eġabi-viriġimito, mukuna na ekearosimito, benamo ġena mama namo vedaureanai etoremto, korana tu ġia ġena veiġa namori boġono kiraġi-foforiri ġana.

<sup>10</sup> Guinenai ġomi tu dia Barau ġena tarimarima, senaġi toma ġomi tu ġia ġena tarimarima. Guinenai Barau ġena vevetuġaġwa tu asi ribami, senaġi toma ġia ġena vevetuġaġwa ġodoġariato.

### *Barau ġena vetuġunaġi tarimari*

<sup>11</sup> Ġatagu mabarami, anoġi-gwaġiġimini, ġomi tu tarima boru e tanukau tarimami mai tano-barai. Tauġani ġena ura rakavari asi boġono veiri, manġeri na vanaġivanaġi ġomi iaukami ġevetari-vinirini.

<sup>12</sup> Senaġi Barau asi ribari tarimari ġoirari ai ġemi veiġa beġene namo. Beġe rori-toremni, rakava-vei tarimami ai beġe kiraġimini, senaġi ġemi veiġa namori beġe ġitarini neganai, ġia na Barau beġe vaġa-raġeani, ġia na tarimarima bekota-vinirini ġaronai.

<sup>13</sup> Veregāuka gōvaḡa-moḡoniani nai, gavamani ḡeri taravatu mabarari boḡono korana-iaḡiri: Kini boḡono seḡaḡi-vinia, korana ḡia tu varaḡe vedau-rea.

<sup>14</sup> E gavana tauri boḡono seḡaḡi-viniri. Ġia na veiḡa rakava tarimari beḡene vaḡa-rakavari, ema veiḡa namo tarimari beḡene vaḡa-namori ḡana eḡabi-torerito.

<sup>15</sup> Korana Barau ḡena ura tu, ḡomi ḡemi veiḡa namori na asi ribari tarimari ḡeri guruḡa babob-abori boḡono lautariri.

<sup>16</sup> Kokore ai boḡono tanu, be dagara ta na asi bene barubarumi, Keriso na eruḡa-vaḡirito tarimari kavana. Senaḡi asi boḡono kira, “Ġai tu maḡuri namonai e fakanai ḡatanuni, be veiḡa rakavari baḡa veirini tu asi kara ta.” Asiḡina. Barau ḡena vetuḡunaḡi tarimami ai boḡono tanu.

<sup>17</sup> Tarima mabarari boḡono gubakauri. Karomi veḡabidadama tarimari boḡono ura-viniri. Barau boḡono vaḡa-raḡea, e kini boḡono gubakaua.

### *Keriso kwakuna gabunai boḡono raka*

<sup>18</sup> Tuḡu-rakaorakao tarimami asi voimi, ḡitaḡaumi tauri boḡono seḡaḡi-viniri, moḡoni ai boḡono gubakauri, dia veiḡa-namo e garo-namo tarimari moḡo, senaḡi niara-niara tauri maki.

<sup>19</sup> Korana Barau na eura-viniani veiḡana tu maḡa: Barau ḡena ura ḡokorana-iaḡirini dainai, enabe asi ḡemi rakavai beḡe vaḡa-midigu midigu-mini, senaḡi boḡo vevaḡa-gwaḡiḡini.

<sup>20</sup> Ġemi rakava dairi ai beḡe kwarimini ma boḡo vevaḡa-gwaḡiḡini, moḡa ḡena namo ḡomi ḡemi ai tu kara? Senaḡi bema veiḡa namori ḡoveini



nuġanai beġe vaġa-midigu midigumini ma boġo vevaġa-gwaġiġini moġo, Barau ġoiranai tu namo eġabi-raġeani.

21 Ġomi tu moġesi boġono vei ġana, Barau na ekeamito. Korana ġomi daimi ai Keriso tauġena emidigu-midiguto, e ġia na mai vevaġa-ġita ġomi ġemi ai eraga-kwaneato. Moġa lorinai ġomi tu ġia kwakuna gabunai boġono raka.

22 Ġia na rakava ta asi eveiatio, e ta na ġia muruna na ġofaġofa guruġana asi eseġaġiatio.

23 Ġeguruġa-rakava-viniatio, senaġi guruġa rakavari na asi evaġa-voirito; ġevaġa-midigu midiguato neganai, vaġa-voi guruġari asi ekiraġirito. Ġia ribana, Barau tu vevaġa-maoro tauna iobukaiobukana, naima ġia ġimanai etoreato.

24 Keriso tauġena tauġaninai ġita ġera rakava eġwa-raġerito satauro tuġuna ġana. Moġesi eveito tu, vei-rakava ġenai bitana mase, asi ma bitana vei-ġenoġoia, ema vei-iobukaiobuka ġenai bitana maġuri, Barau ġena ura bitana korana-iaġiri. Boġono tuġamaġi: Ġia manuġana dainai, ġoi onamoto.

25 Ġomi tu rekwerekwa mamoeiri kavari ġoraka-taġui taġuito-ġoi. Senaġi toma ġomi tu iaukami nariġauna e ġitaġauna tauna Keriso na ma beġabi-ġenoġoimi.

### 3

#### *Veġaraġo vavinemi ema taumi*

1 Ġomi veġaraġo vavinemi maki moġesi, ġaraġomi gabureri ai boġono tanu. Moġesi boġo

veini nai, tari ġaraġomi tu Barau ġena guruġa asi ġevaġa-moġoniani tauri, senaġi ġemi veġa namori na moġo nuġari beġabirini, benamo beġe vetuġamaġi-kureni; a Barau ġena guruġa ta ġeri tu asi boġo kiraġiani.

<sup>2</sup> Korana ġemi veġa roroġotori ema ġemi veg-ubakau ġia ġeri ai beġe ġitarini tu namo.

<sup>3</sup> Marevami ġenamo-vedaurea urari ai tauġanimi asi boġono vaġa-veraverari. Ilailana, ġuimi ġovei-iraurini, golo ġotoreni e dabuġa namori vedaureari ġoriġorini.

<sup>4</sup> Asiġina, ġomi tu lorumi ġuturi neġi boġono vaġa-veraverari, asi beġe rakavani veraverari na, manau e nuġa-namo. Moġeri tu Barau ġoiranai dagara baregori.

<sup>5</sup> Guinenai, ġita tubura ġatara ġeri negai maki vavine veaġari, Barau ġenai ġeveġabidadamato-ġoi vavineri, tu moġesi ġevevaġa-marevato-ġoi, e ġaraġori gabureri ai ġetanuto-ġoi.

<sup>6</sup> Sara kavana, ġaraġona eġeġaġi-viniato-ġoi; ġaraġona tu “Ġegu vereġauka” etato-ġoi. Ġomi toma tu ġia natuna, bema ġemi veġa tu namo e kara ta garina asi ġoveini.

<sup>7</sup> Ġomi tau maki ġaraġomi ġesi ġotanuni nai, boġono riba-ginikauri. Boġono riba, ġia tu asi fakosiri. Ġaraġomi boġono gubakauri, korana Barau na maġuri vanaġivanaġi tu ġia e ġomi bevarevare-vinimini. Moġesi boġono vei, be dagara ta na ġemi ġauġau-vegogo asi bene vaġa-rakavari.

*Veġa namori ai bitana midigu-midigu*

<sup>8</sup> Guruḡa vaḡa-magona maiḡa: Mabarami nuḡami boḡono vaḡa-sebonari, boḡono vevaḡa-kava-vevini, e boḡono veura-vevini tarikaka kavari. Boḡono vevetuḡaḡwa-vevini e boḡono marana.

<sup>9</sup> Veḡa rakavari e garo rakavari asi boḡono vevaḡa-voi-vevini, senaḡi ḡevaḡa-rakavamini tarimari boḡono vaḡa-namori. Korana Barau na ekeamito tu moḡesi boḡono vei, benamo ḡomi na maki ḡena vevaḡa-namo boḡono ḡabia.

<sup>10</sup> Korana Buka Veḡa ekirani,  
 “Deikara maḡuri eurani e ḡaro namori bene ḡitari etoni tarimana tu meana bene naria,  
 guruḡa rakavari asi bene kiraḡi,  
 e muruna na ḡofaḡofa guruḡari asi bene kiraḡiri.

<sup>11</sup> Rakava bene raga-kwaneana,  
 veḡa namori bene vei.

Maino bene vetaua nuḡana mabarana ḡesi.

<sup>12</sup> Korana Vereḡauka na tu vei-iobukaiobuka tarimari eḡita-ḡaurini,  
 e ḡeri ḡauḡau eseḡaḡirini.

Senaḡi vei-rakava tarimari tu  
 Vereḡauka na asi eura-vinirini.”

<sup>13</sup> Veḡa namori bouravini-baregorini nai tu, dei na ḡoi bevaḡa-rakavamuni?

<sup>14</sup> Senaḡi irau beḡe vaḡa-mididgu midigumini ḡemi vei-iobukaiobuka dairi ai nai tu boḡono iaku. Tarima ta garina asi boḡono vei, e asi boḡono daradara.

<sup>15</sup> Senaḡi nuḡami ai Keriso boḡono korana-iaḡia, boḡono vaḡa-raḡea, ḡia tu ḡomi ḡemi Vereḡauka. E

vanaġivanaġi boġono venari-taġo, bema ta na bedanaġimini, “Kara dainai Keriso ġoġabidadama-viniani” betoni nai, ġena boġono kiraġi-ginikau.

<sup>16</sup> Senaġi manau ai e vegubakau ai ġena boġono kiraġi-ginikau. Ġemi veiġa loriri boġono toreri, asi namo gabivau boġono riba ġomi tu asi maoro. Keriso murinai ġorakani ma veaġami ġesi dainai, ġemugumugu-iaġimini e rakavami ġekiraġini tari-mari tu tauġeri roġo beġe maiakarini.

<sup>17</sup> Barau ġena urai veiġa namori ġoveini dairi ai ġomidigu-midiguni nai tu namo. A asi namo ġemi veiġa rakavari dairi ai boġono midigu-midigu.

<sup>18</sup> Keriso emaseto, ġera rakava bene voi-vaġiri ġana. Ġia tu nega sebona moġo emaseto, asi ma bemaseni. Ġia tu vei-iobukaiobuka tauna, ġita rakava tarimara bene kurevora, be Barau ġenai bene ġori-iaġora ġana. Tauġani maġurinai tu ġevaġi-maseato, senaġi iauka maġurinai ġia tu evariġisi-ġenoġoito.

<sup>19</sup> E iaukai ġia eiaġoto mase gabuna o dibura ġana, monai ġetanuni tarimari iaukai ġeri ea ġobatato.

<sup>20</sup> Ġia tu guinenai ġekira-sirivaġito tarimari, Noa na ġasi baregona eveiato neganai, benamo Barau na evaġa-nogarito ma vevaġa-gwaġiġina ġesi, (ġeri rakava ġerina beġene vetuġamaġi-kure ġana). Senaġi ġasi baregona nuġanai ġerakatoġato tarimari tu asi ġutuma. Tauri mabarari tu imaima toitoi (8) moġo nanu na evaġa-maġuririto.

<sup>21</sup> Mo nanu moġa tu babatiso vetoġana kavana, korana babatiso na toma ġomi evaġa-maġurimini, dia tauġani mirona ġuriġi-vaġina, senaġi Ba-

rau gōnoḡiani nuḡami bene iarevari ḡana Barau ḡoiranai. Iesu Keriso mase na evaḡa-variḡisi ḡenoḡoiato bakunai evaḡa-maḡurimini.

<sup>22</sup> Ġia tu gubai eraka-toḡato, Barau aroribana rekenai etanuni. Aneru, e ma ḡeri maoro baregona iaukari, ema seḡuka tauri mabarari tu ḡia gaburenai ḡetanuni.

## 4

### *Ekalesia maḡurina*

<sup>1</sup> Keriso tu tauḡaninai emidigu-midiguto lorinai, ḡomi maki ḡemi tuḡamaḡi boḡono vaḡa-gwaḡiḡiri, ḡia ḡena tuḡamaḡi ḡesi beḡene ilaila; korana tauḡaninai emidigu-midiguni tarimana na veḡa rakavari eraga-kwanerini.

<sup>2</sup> Tauna moḡa, ḡomi roḡo mai tanobarai ḡotanuni nuḡanai tu, tauḡanimi ḡeri ura rakavari asi boḡono korana-iaḡiri, a Barau ḡena ura neḡi boḡono korana-iaḡia.

<sup>3</sup> Ġomi tu kai-veḡata Barau asi ribari tarimari ilailari ai ḡotanuto-ḡoi, mata-boraḡa e veḡuravanaḡi veḡari ḡoveito-ḡoi, ḡoniu-lelevaḡito-ḡoi, ḡovei-taḡuitaḡuito-ḡoi, ḡoniu-vegogoto-ḡoi, e barau ḡofaḡofari ḡotoma-rakarigo vinirito-ḡoi.

<sup>4</sup> Toma, ḡia tu ḡeveiauni, korana ḡia ḡesi asi ḡovekakoni, e asi ḡovei-taḡuitaḡuini. Moḡa lorinai rakavami ḡekiraḡini.

<sup>5</sup> Senaḡi ḡia tu maḡuri tarimari e mase tarimari vaḡa-maoro-viniri Barauna ḡoiranai beḡe ritoḡoni, ḡeri veḡa moḡeri beḡe kiraḡirini.

<sup>6</sup> Moḡa lorinai Iesu na Vari Namona tu ḡemaseto tarimari iaukari ḡeri maki evari-fuato.

Moġesi eveito korana tu, enabe Barau na tauġani ai evaġa-maoro vinirito tarimarima mabarari kavana, (mai tu ġemaseto), senaġi iaukai tu roġo beġe maġurini, Barau emaġurini kavana.

*Barau ġena varevare dagarari ġitaġauri tarimari namori*

<sup>7</sup> Dagara mabarari magori tu bekavinaġi. Boġono venari-taġo e boġono vevaġa-gwaġiġi, be ġemi ġauġau asi boġono vaġa-ketoa.

<sup>8</sup> Barego vedaureana tu, tata boġono veura-vevini ma nuġami mabarari ġesi, korana veura-vevini na rakava ġutuma elautaririni.

<sup>9</sup> Karomi tata ġesi veiġa namori boġono vei-vevini, boġono veġabiraġe-vevini, asi boġono vemugu-mugu e veroritore.

<sup>10</sup> Ġomi tata mabarami tu, Barau na evaġa-ġaunamito varevare dagarari irauirau ġitaġauri tarimami namomi, moġa lorinai karomi dairi ai boġono ġauvei-iaġiri, kamara varevare dagarana Barau ġenana ġodoġariato ilailanai.

<sup>11</sup> Deikara eġobatani nai, ġia tu Barau ġena guruġa bene vari-fiua. Deikara evevaġa-kavani nai, ġia tu Barau ġena kokore na bene vevaġa-kava. Mo dabarai dagara mabarari nuġari ai Barau bita vaġa-raġeani, Iesu Keriso bakunai. Mareva namona e seġuka tu ġia ġena, bene iaġo mo vanaġivanaġi. Amen.

*Ekalesia midigumidiguna*

<sup>12</sup> Ġataġu mabarami, midigumidigu karava mamiri noġa ġoġabini nai tu, nuġami asi beġene farevaġi, asi boġono kira, dagara boruna ta ġemi

ai egorani. (Asigina, mani tu gomi tovonagimi dagarana moĝo).

13 Senaĝi Keriso emidigu-midiguto kavana gomidigu-midiguni dainai, boĝono iaku, gabivau ĝia marevana baregona bevaĝa-foforiani neganai vau ma boĝo iaku-sirivaĝini.

14 Keriso murinai ĝorakani nai, rakavami beĝe kiraĝini neganai, boĝono iaku, korana monana boĝo ribani, Barau Iaukana, mareva-namo Iaukana, tu gomi iatami ai etanuni.

15 Bema gomi ta omidigu-midiguni nai, mani midigumidigu tu dia ovevaĝi-debani, o olemani, o seĝafore veiĝana rakavana ta oveiani, o tarima ta ĝena ĝauvei metona oveiani nai omidigu-midiguni.

16 Senaĝi bema ĝoi tu Keriso murinai orakani dainai omidigu-midiguni neganai, asi bene ma iakamu, senaĝi Barau bono vaĝa-raĝea, Keriso arana oĝwa-rakaoani nai.

17 Barau ĝena vevaĝa-maoro negana tu varau beraĝasi, e vevaĝa-maoro tu Barau ĝena tarimarima ĝeri ai bevesinani. Bema ĝita ĝerai bevesinani neganai, Barau ĝena Vari Namona asi ĝevaĝa-moĝoniani tarimari ĝeri ai tu kamasi bea ĝorani?

18 Korana Buka Veaĝa ekirani,  
 “Maĝuri ĝabiĝabina Barau ĝeseĝaĝi-viniani tarimari ĝeri ai tu gwaĝiĝi.  
 O Barau asi ĝevaĝa-moĝoniani  
 e vei-rakava tarimari dabarari tu kamasi bevetoreni? (Ĝia ĝeri ai tu meto lelevaĝi!)”

<sup>19</sup> Tauna moġa, Barau ġena ura lorinai midigu ġeġanini tarimari tu veiġa namori moġo beġene vei, ema ġeri maġuri tu eveirito Barauna ġimana nuġanai beġene toreri, korana ġia na etuġamaġi-kaurini.

## 5

### *Ekalesia ġorikauna tarimari*

<sup>1</sup> Au na ġomi fakami ai ekalesia ġorikauna taumi avaġa-guruġamini. Au maki ekalesia ġori-kauna taugu. Keriso emidigu-midiguto-ġoi au tu matagu na aġitaiato, e ġia marevana baregona bevaġa-foforiani neganai, au tu ma augu. Moġa lorinai au na ġomi anoġi-gwaġiġimini:

<sup>2</sup> Barau ġena mamoe serina boġono ġitaġau-ginikaua. Ġia na ġomi evinimito tu, nuġami na eura-iaġiani lorinai boġono ġita-ġaua, ġia ġena ura ilailanai. Dia mugumugu ai, senaġi nuġami na eura-iaġiani lorinai. Dia moni o farefare boġono doġari ġana, senaġi nuġami ġeri urai.

<sup>3</sup> Barau na ġomi ġemi veġitaġau gaburenai etoreato mamoe serina (o ekalesia doġorona) asi boġono dori-naġinaġia noġa moġo vere baregori ġeveini kavana. Senaġi ġomi marevami boġono vaġa-ġitari, be beġene tovotovomi.

<sup>4</sup> Moġesi boġo veini nai, mamoe Ġitaġauri Tauna Baregona, Keriso, beġoira-refoni ġaronai, korona namo vedaureana, asi berakavani da-garana, boġo ġabiani, mo tu maġuri vanaġivanagi.

<sup>5</sup> Moġa ilailanai, ġomi tarima variġumi maki veġitaġau tauri boġono seġaġi-viniri, ma ġomi



mabarami na manau dabuḡana boḡono ved-abuḡa-iaḡia, boḡono vevaḡa-kava-vevini, korana Buka Veḡa ekirani, “Veiavi tarimari tu Barau na elautaririni, senaḡi manau tarimari tu ḡena namo e varevare-bara evinirini.”

<sup>6</sup> Moḡa lorinai, tauḡemi boḡono vevaḡa-manau, Barau ḡimana seḡukana gaburenai, benamo ḡarona bene raḡasi neganai, ḡia na bene ḡabi-vaismi.

<sup>7</sup> Ġemi nuḡa-vekwarāḡi dagarari mabarari ḡia ḡimanai boḡono toreri, korana ḡia na eḡita-ḡaumini.

<sup>8</sup> Boḡono tuḡamaḡi-roroḡoto, boḡono venari! Korana vaḡa-rakavami tauna, Diabolo, tu erakao-rakaoni, laion noḡa emagarani, emaramarani, ta neḡania uranai.

<sup>9</sup> Ġemi veḡabidadamai boḡono ruḡa-gigitari, benamo Diabolo boḡono kora-ḡoia. Korana boḡono tuḡamaḡi, ḡoḡanini midiguri ilailari tu ḡomi karomi tanobara mabaranai maki ḡeḡanini.

<sup>10</sup> Senaḡi Barau, namo e vare-vare-bara mabarari na evonuto Barauna, na Keriso bakunai ekeamito, nega kotunai moḡo boḡo midigu-midiguni murinai, ḡena tanu-vanaḡivanaḡi marevana namona boḡono ḡabia ḡana. Ġia na vau bevaḡa-namo ginikaumini, bevaḡa-ruḡa gigitarimini, e bevaḡa-kokoremimi.

<sup>11</sup> Seḡuka tu ḡia ḡena, bene iaḡo vanaḡivanaḡi! Amen.

### *Vevaḡa-namo magona*

<sup>12</sup> Siluano, (mai tu Silas), na bevaḡa-kavagu, mai fefa kubina baḡa tore-iaḡosia ḡomi ḡemi. Ġia

au na aġitaiani tu, ġita tarikakara ma ġena vetuġamaġikau ekalesia nuġanai. Mai fefa batorea korana tu ġegu ura bana vaġa-kokoremi e bana vaġa-ribami, Barau ġena namo e varevare-bara moġonina tu maiġa. Be mai namo e varevare-bara nuġanai boġono ruġa-gigitari.

<sup>13</sup> Ġomi karomi ekalesia tarimari Babuloṅa ai maiġeri, (mai tu ekalesia tarimari Romai eki-raġirini), ġia maki Barau na eġabi-viriġirito tarimari, na ġemi vevaġa-namo beġe tuġu, e natugu Mareko na maki ġemi vevaġa-namo betuġu.

<sup>14</sup> Veuravini verauna na boġono vevaġa-namovevini.

Keriso nuġanai ġotanuni tarimami mabarami maino ġemi ai bene tanu.

**GINITAŌ VARIŪNA**  
**The New Testament in the Sinaugoro Language of**  
**Papua New Guinea**  
**Nupela Testamen long tokples Sinaugoro long Niugini**  
Copyright © 1995 The Bible Society of Papua New Guinea

Language: Sinaugoro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 18 Apr 2025 from source files dated 31 Aug 2023  
a998e4ce-f2f7-5577-968e-5d2feef358f1